

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojtiajaca

¹ ¿Niaate quiyajaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa cua pohuatanura, taa na Que Pueyaso paniquiaaricujani. Niaacuara naajiyaniija, canapue Pueyaso saquiriojoquiaari tama neracuajani, canapueete Jesucristo tojtianaacuajani. ² Pa Que Pueyaso, mariyata pa Jiyaniija Jesucristo cuara taraajeera niaacua, maninia na miiniuria nijaniya. Nojori cuara cajitiiria nioojia pueyaracaanujuhaj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenucua, Pueyasoori capora pajaniyara. Nojuajaari jiyanojua maninia miiquiaa pajaniya, puetunu jiyocuacaanu na jiiatasano cumaacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojijiaca pa quiniuria, tojetaarucujanaa sesa miyashijia pa quiniuriajuhuaj. ⁵ Panijia na

quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacujani. ⁶ Jiyanhua maninia na panishano Niyanuniyojua miiniuucua pocuara, nojuajaari pueyaracaanu jiyanooquiaa pajaniya. Nojuajaari jiyanhua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. ⁷ Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. ⁸ Pueyasoori na paniniu niishitiquiaari pajaniya, na niquitiosacari na niishitiaja pajaniya, puetunu casaa niishijijianaa pa quiniuria. ⁹ Nojuajaari jiyanhua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiya. Nojuajaari Cristo jiyatenutaniya Jiyaniijijianaa na quiniuria. Naacujitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricujani.

¹¹ Pueyasoori tariucuacaanu pa saquiriojoquiaari Neyanutaja na cojiritianura pajaniya,

maninia na miiniuria pajaniya. Pueyasojuanaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniuucua. ¹² Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujuanaa Jesucristoocua tiuquiaarini. Naa jiyanhua maninia Pueyaso miiniuucua canaa, nojuaja cuara maniniuhuaqueetasaria jiyanhua. ¹³ Quiari naataja nia tojishacari Jesucristo rupaa, niaari cuno seetanu rupaacuajanaa tiuquiaarijiuhuj, Pueyaso muerasura jatanishano nia quiniuria. Naa nocua nia tiuuniuucuatej, Pueyasoori Neyanu nia rupuetequiaari. Na Sohuanu niqutioquiaari nijaniyajaariuhuj taa na sequequiaaricuajani. Naacuaji niishishaaquiaari, niaari seetanujuanaa Pueyaso muerasu. ¹⁴ Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranujuanaa masenutaniya Neyanutajuhuj. Pueyaso Sohuanu pa jiihiasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucuajanaa jatanishaanutaniya juhua Neyanu pa niquishaanurajuhuj. Cunora, Pueyasoori jiyanhua maniniuhuaqueetasano quiniutianiya, jiyanhua maninia na miiniuucua pajaniya.

Taa Pablo secojoquiaari Pueyaso pueyacuarani

¹⁵ Janiyari niajanijajiniji tojiriucuaani, taa pa Jiyaniijia Jesuucua tiuujaca nia quiyani, taa parta Pueyaso pueya panijaca nia quiyajaaniuhuj. ¹⁶ Cunora, pueyaracaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura niajaniya jiyocuacaanuji niishitiaja. Naacuaji nia naata niishiniu na niishitiniu panishano niajaniya, maninia nia niishiniuria nojuajuhuj. ¹⁸ Janiyari niaacuara secojoquiaajaaniuhuj, Pueyaso cuara cuhuataara nioojia, maninia nia niishiniuria casaara Pueyaso saquiriojoquiaari niajanijani, casaa na miiniutianiya niaarajaniuhuj. Janiyari niaacuara secojoquiaajuhuj, maninia nia niishiniuria taa Pueyaso muerasu jiyatesaanutaniya shacantuuca quijiaca nojori quiniuriani. ¹⁹ Janiyari secojoquiaajuhuj, Pueyaso cuara niishitiiria na cumaaca niajaniya, cuno, nioojiajinia poonijiyani. Na cumaacaari jyanohua, puequeyashijia. ²⁰ Pueyasocuajaari cuno na cumaaca poonitijioquiaari Cristo quetejinia, nojuaja jaara na samiitianiquiaariuhua macujiniji. Jaara na samiitianiquiaari, cuno na cumaacata na cajitiquiaariiri Jiyaniijiajanaa cajitiujinia na miaquetajara jiyocuacaanu. ²¹ Tii na cajitiquiaariiri puetunu tamasaca cumaacaraca quijiaca Jiyaniijiajanaa na quiniuria. Majaari

tamonu socua cumaacaraca quijia quiniu pa Jiyaniijiajiniji. Nojuajaari puetunu tamasa jiyaniijianucujanaa Jiyaniijia. Puetunu mijiria quijiaca jiiiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianiyajuhuj, taa quiarjia na quiyacuajani. ²² Naacuajitij, Pueyasoori puetunu na shipinishanojuanaa jiyatequiaari Jesucristo jiiiasocoriquiano. Naajuhuj, Pueyasoori Jesucristo jiyatequiaari na saquiriojosano pueya jiiitariquiano, canapuate nocua tiuujiacacuajani. ²³ Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuujia, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupuetesaare, Cristo cuaqueyari tucateenutaniya seetanujuanaa maninia jeeccanamtishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuj, nojuajaari puetunu tiqiyocuajanaa quijiajuhuanajaj.

2

Panijia Pueyaso quiniuucua, nojuajaari pa jiyanooquiaari

¹ Sesa miijiacaa nia quiniuucua tarijia, Pueyaso tojiyashijiacajuhuj, niaari macunucua quijia Pueyasora. ² Niaa jaara naa sesa miijiacaa quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari.

Niaari samaruhua jiyaniiija tojjiaca quiquiaari, cuno, paratu piyarojosaqui quijiani. Nojuajaari Pueyaso tojiyashijiaca shiniuujia, nojori miiniuria sesa, taa Sesaaca seque paniyacuajani.

³ Tariija, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaaja miijiaca quiquiaarini. Naacuajitij, paari puetunu pa cuaqueya miiniu panishanojuanaa miijiaca quiquiaarini, puetunu sacuaraatia pa niishiriojosanojuhuaj. Naa sesa miijiaca pa quiniuucuatej, paari tojetaarucujanaa jiyanhua Pueyaso saniitosocoriquiano quiquiaari juucuan, juhua tamasacajuhuj.

⁴ Saniniuujia, Pueyasoori pocua taraajeja cutara. Jiyanhua pa paniquiaariiri.

⁵ Cunora, macunucua pa quishacariija nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jiyanootio Pueyaso quiniuucua, nojuajaari nia jiyanooquiaari.

⁶ Naa na samiitianijionuucua pajaniya Cristoocua pa tiuuniucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya.

⁷ ¡Naa Cristota na cojiritianuucua maninia miiniu pajaniyatej, cunoori jiyanhua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanhua pa panijia. Maatia niishishaanutaniyari Pueyasoori tojetaarucujanaa jiyanootio cutara, na jiyanooniucua pajaniya, Neyanuucua pa tiuuniucua.

⁸ Naa Pueyaso quiniuucua jiyanootiotej, nojuajaari nia jiyanooquiaari

saaja Jesuucua nia tiushacari. Majaari tama nia miishanotajaaja Pueyaso nia jiyanootiniu quiquiaari tama nijaniyajaaja. Pueyasojuanaacujaari nia jiyanooquiaari niaacua na taraajenuucua. Naajuhuj, nojuacujaari nia tiutiquiaari Neyanuucua. ⁹ Majaari Pueyaso jiyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiarenini juhua najuhuana pocuja. ¹⁰ Shushajanaa Jesucristoocua pa tiushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacujaari tari naa niishiriojoquiaari, maninia miijiacara na jataniniuria pajaniya.

Jesucristoori pa jiyateja jiyanootiojuacara

¹¹ Éfeso tiacajinia quiniaa pueyanaa, quiaritia nia niishiriohua taa nia quiquiaari tariucuacaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniuucua. Canaa cutaraari canaa cararaatiuuquia co miatesanoni. ¹² Nia niishirijihuj, naa nia quishacaritij, niaari Cristoaju quiquiaari. Majaari nia naata rupueni quijia Pueyaso saquiriojosano Israel pueya. Puetunu Pueyaso sequesanojuanaa Israel pueyanoni, cunoori maja niaarano quiquiaari. Majaari nia niishiniu quiquiaari Pueyasoori pueyacujaji Tacuriquiano jiyaronutaniya

mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. ¹³ Tariija, niaari seetanujuanaa tucuacaanu quijiaca quiquiaari Pueyasojiniji. Quiarijia saniniuujia, Jesucristo shootenuucua na nanaca niyacutesanojinia, niaari nata rupuetootesaquiaari, nocua nia tiuushacari. Naacuajitij, niaari canaa rupuejacajuhuj. ¹⁴ Cristocujaaari pa jiyanootiooteguiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuj, taucuaca nia quiniuucua. Jesucristocujaaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, niajaniya taucuacanio. ¹⁵ Naa pa niti Jesucristo cusuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tariija, paari juhua caapiqui tiaca quiquiaarini. Paari pueyaracaanu paracaatioojua quijiani. Quiarijia saniniuujia, Jesucristo cusuucua, nojuajaari pa jiyanootiooteguiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶ Naaratej, janiyari socua camiya nia sequenuni. Cristo cusuucua niyacutesanojinia,

nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, niajaniya taucuaca, canaajuhuaaj. Naacuaajitij, Jesucristoocua pa tiuushacari, paari juhua niquiriyatu tiaca nerani.

¹⁷ Niajaniya taucuacanaa, niaari juhua tucuacaanu quijiaca quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni paniya pajaniyani. ¹⁸ Cristo jiyanootiniuucua na Que Pueyaso pajaniya, naacuaajitij, pa naata pa Que Pueyaso rupuenu pa secojosacari nojuaja, mariyata na Sohuanuraca pa quishacari, niajaniya, canaajuhuaaj. ¹⁹ Jesuucua tiuujia nia quishacari quiarjia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio ruconaa. Quiarjiani, niaari seetanujuanaa Pueyaso pueya cutara. Pueyasoori maninia nia jiitiaajuhuaaj, taa na jiitiaquiaa puetunu na saquirojiosano pueyacuaani. ²⁰ Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiunaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijiujanaa cutara, cuno tia nujuatana. ²¹ Pueyasoori naa saquirojoquiaa Neyanuucua tiuuriquiano pueya, na quiquiorano na tucuatana. Cuno

tia tucuateesacari, tojetaarucuajanaa maninia jeenucuasano quiniutianiya pa Jiyaniijaraari. ²² Niaari naajuhuaaj, Cristo nia rupuesacari, niarta Pueyaso pueya nia rupuesacarijuhuaj, Pueyasora, niaari juhua rianaa, tucurunio. Nojuajaari nia morojotaquiaa na tia na tucuatnura, na Sohuanu quiquiorano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatanuucua niarta taucuaca, janiyari cunora nujuatesano quiya nujuatejojuajiniani. ² Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quiniuriajuhuaj. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuaaj, taa na jiyanooquiaacuaa Judiocuacani. Pueyasojuanaacuajaari naa jiyasohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa nijaniyacujani. ⁴ Niaa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanohua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno,

jiyasohuaja na miiniu panishano taucuacani. Na sequenu panishano caminiujiunia pueya na niishitiquiaariijaariuhuj. Pueyaso Sohuanucuajaari cuno canaa niishitiquiaari. ⁶ Niajaniya taucuacanaa, niocuajaari Pueyaso miiniu panishano jiyasohuaja niajaniya: Jesucristoocua nia tiuuniucua, Pueyasoori puetunu Judiocuacarano na sequesanojuanaa jiyatenutaniya niaarajuhuj. Canaari Judiocuacani. Naajaa, Jesucristoocua nia tiuuniucua, Pueyasoori canaa rpuetequiaa niajaniya, juhua niquiriyatu pueyano pa quiniuria nera. Naajuhuj, cunora, Pueyasoori nia niquitioquiaa na Sohuanujuhuj, taa na sequequiaari Neyanu Jesucristoocua tiuujiacacuajani.

⁷ Janiyari Jesucristo ruuretaja quiquiaarini. Naajaa, jiyanhua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniuucua tarijia, janiyara, janiya cuara socua rerequetesano pueyano quiria puetunu cuarta Pueyaso pueyajinijijianaa. Saniniuujia, jiyanhua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucuacara. Janiyari cunora Pueyaso shuquiritiaa jiyanhua. Cristo jiiitasano pajaniyanoni, puetunu cuno casaajanaari pa niishishoojua. ⁹ Tariucuaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari

niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyaracaanu tama na niishitiajajiniajaaja. Saniniuujia, nio pa quishacarini, nojuajaari na niishitiquiaari. Quiarijiani, jiyanohua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanohua niishijia cutara. Naacujitij, Pueyaso seya, Satanás, samaruhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacujitij, Jesucristoocua pa tiuuniuucua, pa naata juhuajaniya rupeenu na Que Pueyaso pa puereyaquiniutia. ¹³ Naa Pueyaso miiniuucua pajaniyaratej, majaari nioojia nia niquijiotenu Pueyasoocujaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua niajaniyatej, shuquiriaatia nia quiri juhuari. Naa naquiya cua miishacaritij, cuno cuara shiniuujuuria niajaniya, socua pa Jiyaniijia tojijiaca nia

quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucujuhuj, janiyari mojuquetaquiaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujuaanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniuucujuhuj, janiyari niaacuara secujoquiaani, nojuaja cuara cumaquiiria jiyanohua nijaniya na Sohuanuta nioojiajinia. Na Sohuanuuri puetunu pa panishanojuanaa jiiitiana. ¹⁷ Naajuhuj, niaacuara secujoquiaanjia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujiaa nia quishacari. Naacuajitij, niocua niishiri taa Jesucristo paniya jiyanohua nijaniyani. Naacuajitij, majaari nioojia nia niquijiotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja

pa riuritanu quiniutianiya. ¹⁹ Seetanujuanaa, majaari pa naata niishiniu taa jiyanoehua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Niaa jaara na paniniu niishiri, Pueyasajuanaari nioojiajinia quiniutianiya. Naacuajitij, niaari tojetaarucua-janaa panijiaca quiniutianiya taa Pueyasocuaani.

²⁰ Naa Pueyaso miiniuucua maninatej, nojuaja cuaara shuquiritiasaaria. Naa jiyanoehua na cumaacata na poonijosacari poojiajinatej, nojuajaari na naata miiniu socua jiyanoehua queraatia pa masesanojiniji nojuaja, pa niishiriojosanojininio. ²¹ Puetunu quijiacajanaa cuaara niishiria Pueyasoori jiyanoehua maninia. Nojori cuaara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuaara naa shuquiritiasaaria pueyaraanutej!

4

Pueyaso Sohuanu pa jittiasacari, paari rpuetootesano quiijiani

¹ Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojiijaca nia quiri, seetanujuanaa maninia na muerasu nia quiniuria. Pueyasocuaajaari nia saquiriojoquiaari naa maninia na muerasu nia quiniuria. ² Majaari niarta Pueyaso pueya rerequetejaca nia quiniu. Maninia miitiojuaca nia quiriquia. Puetunu casaajanaa rejeretajaca nia quiriujuhaj. Naa

jiuujiaatioojuaca nia quiri nia panitioosacari.
³ Naa Pueyaso jiyanoootiootesacari niajanijatej, pueyaracaanu nia jiyanoootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari niajanijate. ⁴ Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijiara, mariyata niquiriyatu Sohuanuraca pa quishacarijuhuaj. Naa Jesucristoocua tiuujia pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria.
⁵ Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijiara. ⁶ Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacua-jaari tari jiiitiaa tamaatia poonijosano pa miiniuriani, teyano Cristo niqutionu paniquiaari pajaniyacujani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuacaanu Pueyaso Rupaa naajio-tasanojiniji, paari niishiyani Pueyasoori na Sohuanu niqutionu paniquiaari na pueya. Cunora

naa sequeya Jesucristojiniijiiri:

“Na quiuosano pueya tacataquiaariuhua jiyocua-caanuuri. Nareja na niqutionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojuaja jiyocuacaanuji rosequiaari coteenu, taraatia mijiria na mosaanura pocuara. ¹⁰ Nojuajani, jiyocuacaanuji rosequiaarini, nojuajaari tojetaarucujanaa jiyocuacaanu tacaquiaariuhua, Jiyaniiijajanaa na quiniuria na Que shuriucua. Tacaquiaariiri puetunu jiya cajiniocuajanaa na mishininiuria na cumaacata, puetunu jiyajanaanio. Naacujitij, nojuajaari puetunu tiquiyocuajanaa quiija. ¹¹ Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano caminiuujunaa nojori quiniuria. Saniniuujia, tamasaca jiyatequiaariiri Jesucristo niishiyashijiaca niqiara poojotanaa nojori quiniuria, Pueyaso jiyanooniuria nojorijiuhuaj, Jesuucua nojori tiushacari. Tamasaca jiyatequiaariiri na tojitiajaca pueya jitianaa nojori quiniuria. Tamasaca jiyatequiaariiri na rupaa niishitiojonaa nojori quiniuria narta Pueyaso pueyara. ¹² Naacujitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhuj. Naa Jesucristoocua tiuujia pueya canesacari

socuatej, Jesucristo cuaqueyari canequiaa.
¹³ Jesucristora poonijionaa pueyari naa poonijioquiaatej, paa cuaara tojetaarucujanaa pa Jiyaniijia tojiijaca quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuaara seetanujuanaa Pueyaso Niyanu niishijiaca quirijiaatijia. Naacuajitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niquijotejajaariuhuj. Naa juhua tariucua cumueeca mashaja pa quishacaritij, majaari quenaaja tamasa naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanojua sapojonu niishijiaca, nojori tojitiajaca na tashuquootenura Pueyasojiniji. ¹⁵Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia.
¹⁶Pueyanaa, niaacuajaari niishiya, puetunu pa cuaqueyajiniacuma casaa pa jiiitiasanojuanaari maninia rupuetootesano. Puetunu cunojuanaa jaara maninia poonijioquiaa jatiqii, paari maninia quiyani. Pueyaso muerasuuri juhua pa cuaqueya jiiitiasano casaa. Naacuajitij, puetunu Pueyaso muerasujuanaa jaara tama na poonijosanojuaaja miiquiaa maninia taa pa

Jiyaniijia paniyacuajani, pa Jiyaniijia cuaqueyari maninia canenutaniya, jatiqúi rpuuetesano pa quishacari, seetanujuanaa panitiojuaca pa quiniuria.

Cristoocua tiuujiaaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuucua. Naajuhuj, nojoriiri tama na panishanojuaaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. ¹⁹ Naa pueyaracaanu sesa nojori miijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaaja miijiaca. Nojoriiri puetunu sacuaraatia casaajanaa miiniuucua jiyartucono. ²⁰ Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹ Naa jaara Jesujiniji tojiquiaari, niaacuajaari niishiquiaari na rupaari seetanu rupaaajanaa cutara. Niacuajaari na rupaaajiniji niishitiojosaquiaari

maninia miijiaca nia quiniuria, sesa nia miiniu nia tarinitianurajuhuaaj. ²² Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaariijaaja naa sesa miijiaca nia quiniuriatej. ²³ Quiaritia saniniuujia, sesa nia niishitiaja nia jatare, maninia niishitiajaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano nijaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

²⁵ Naacuajitij pueyanaa, majaari socua cuaracashijionujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiiria seetanujuanaa.

²⁶ Niaa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaaj, nia jaara juaari, majaari nia juaaquiaca nia ninitianu.

²⁷ Ritia nia jeecatoore, Sesaaca mariqui sesa nia miitiriiri nia jiyanoyaquishacari.

²⁸ Nio nia tojirijiuhuaaj. Cante nohuasejorua quiyajaani, cuara tarinitiaara nohuasejonu. Saniniuujia cuara poonijioora tama na numatucuatajaaja cutara. Naacuajitij, nojuaja na naata

na jiitiasanojiniji nareja niqutionu tamasa, cante na panishano jiitiaaquiyani.

²⁹ Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuj. Saaja maninia pocuajaca nia quiri cutara. Naacujitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuaj. Naacujitij, nia naata nojori shiniujiuniu saaja Pueyaso tojjiaca nojori quiniuria.

³⁰ Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocuajaari juhua na sesa naajiotaquiaari poojiajinia na Sohuanuta. Naacujitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹ Pueyanaa, majaari jiyanooyashijia nia quiniu. Seetanujuanaa jiyanoojiaca nia quiri cutara. Majaari tamasa shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacujitij, puetunu juaaniujianaan nia tarinitiare, puetunu sesa nia miiniujianaanio.

³² Saniniuujia, maninia miitiojuaca nia quiri. Taraajetoojuaca nia quirijihuj. Naajuhuj, jiyanootiojuaca nia quirijihuj, taa Pueyaso jiyanooquiaari pajaniyacuaani, Neyanuucua pa tiushacari.

5

Seetanujuanaa juhua Pueyaso pueya nia quiri

¹ Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri. ² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanohua sacuaraatia Pueyasora. Majaari quenaaja jiyanosacuaraatia casaajiniji nia pocoojonu. Naajuhuj, majaari tamasaca jiitiasanoocua jiaatiajaca nia quiniu. ⁴ Majaari najuhuana sacuaraatia pocuajaca nia quiniujiuhuj. Majaari najuhuana nia niti nia taquiriocuatenu juhua maninia pocuaja. Naajuhuj, majaari sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso. ⁵ Niaacuajaari tari niishiya, cante juhuajaniya na camishoo maajipohua numuetucujuani, maajishuriuhuanio, nojoriiri jiyanohua taraatia quiniutianiya. Pueyaso jiitiasano na tojijiaca pueyaranoni, majaari na quiniu quiniutianiya naa miijiaca pueyara. Naa taraatia miishaanutaniyajaariuhua puetunu tamasaca

jiitiasanoocua jiaatiajacajanaa. Pueyasora, jiyano pueyari jiyanoehua sesa, juhua juaashiquiata shipinijosano pueyasohua secojonuujuaca. ⁶ Naacuajitij pueyanaa, majaari nia shanacunu tamasaca sapojonura niajaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuajaari juaatishaare. Tari saniitioya na tojiyashijiaca pueyari. ⁷ Cunora pueyanaa, majaari quenaaja naa sacuaraatia miijiaca nia cojiniu.

⁸ Pueyaso niishiyashijiaca nia quishacarijia tarijia pueyanaa, niaari ninishiqui quijiaca quiquiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. ⁹ Paa jaara seetanujuanaa cuhuashiqui quijiaca quirini, paari maninia miijiaca quiniutianiyani. Naajuhuaaj, paari tojetaarucujanaa sesa miyashijiaca quiniutianiyani. Paari seetanujuanaa Pueyaso Rupaa tojijiaca quiniutianiyajuhuaaj. ¹⁰ Naajuhuaaj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori miijosano sacuaraatiaari tojetaarucujanaa jiyanoehua cararaatia. Puhuataaquishoo. ¹³ Saniniuujia, pa nacasusacari

nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacuajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuata-nura quiajaniya!”

¹⁵ Naacuajitij cua panishano pueyanaa, tama nia cuaqueyajaaja nia cojuare jiyanohua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶ Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiriquia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhuaaj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaaj. ¹⁹ Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu

nia naminiujiutioore. Naajuhuj, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaca nia quiniuucua.

Taa quijia pa quiyani Pueyaso tojjia pa quishacari

²¹ Pueyanaa, maninia tojitioojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

²² Maajipohuanaa, nia niyaca tojjijaca nia quiri, taa pa tojiquiaa pa Jiyaniijiacuaani. ²³ Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. ²⁴ Naacuajitij, taa Jesucristo saquiriojosano pueya na tojitiajaca quiyacuaani, maajipohua cuaara naa pueyaracaanu neyaca tojitiajaca quiirijuhuj.

²⁵ Canuunaa, nia niquiocohua nia paniri taa Jesucristo na saquiriojosano pueyarano paniquiaaricuaa jyanohuani. Nojuajaari cunora tama na cuaqueyajaaja tarinitiaquiaari na mosaanura. ²⁶ Nojuajaari naa miiquiaariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucujanaa tari jeequejosano quirini, pa

Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiyani. Paari seetanujuanaa shanohua niquishano quiniutianiyani, juhua camishocoriguiano maniniushitishano niyacoo, tojetaarucujanaa jiyanoehua cohuajaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri nia niqiuocuajuhuj. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijini. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriquiria na que, na nucua shuriucuaji, necocua na quiniuria. Jaara camiri, nojoriri juhua niquiriyatu cuaqueyaraca quiniutianiya”.

³² Pueyasojuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocua. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niqiuorano quiya, juhua niquiriyatu cuaqueyaraca pa

quiniuria nata. ³³ Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijiaca nia quiri juhua tama nia cuaqueyajaaja. Naajuhuaaj, puetunu maajipohuajanaa cuaara neyaca tojijiaca quiiria.

6

¹ Muerasunaa, pa Jiyaniijia tojijiaca nia quishacari, nia queya tojijiaca nia quiriujuhuaaj. Niaa jaara naa miiritij, cunoori jiyanhua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijiaca nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuajani taa na tojitiajaca na miiniutianiya maniniani.

⁴ Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Nia niishitiojore maninijuhuaaj. Nojori nia nacasurejuhuaaj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori seque-sanojuanaa niajaniya nia miiri nia puerenuta,

niaa mariqui saniitiosaareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niquishacari niajaniya, nojori shuquiritia-nura niajaniya. Maninia nia poonijiore pueyara-caanu puetunu nioojiatajanaa, seetanujuanaa juhua Cristora. Niaa jaara naa maninia poonijionuujuaca quiriquiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niquitionutaniya maninia pa miiniuucua mijiria, poonijioteseano pueya, camarnuju pueyano.

⁹ Niajaniyajuhuj seya jiitiajacanaa, nio sequesano nia tojiri. Maninia nia jiitiare nia poonijosano pueya. Majaari na miananajonu. Nia niishirijiuhuj, niaari mariyata niquiriyatu Jiyaniijiaraca, niajaniya, nojorijiuhuj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

Taate pa naata Sesaaca nujuatanuni

¹⁰ Quiarijia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanojua cumueeca nioojia quiniuria jiyanojua na cumaacata. ¹¹ Puetunu Pueyaso niquitiosano casaajanaa nia cushiyore juhua toqueya, Sesaaca sapojiyaquiniuucujia niajaniya. ¹² Pueyaso pueya pa quishacari mijiria, majaari

pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quijiaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishi quijiaca pueya nojori jiiitianura. Nojoriiri Pueyaso paraajuhuj.
¹³ Naaratej Pueyaso pueyanaa, puetunu Pueyaso niqutiojosanojuanaa nia paracata nia miaquetojotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari niajaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujuaari, puetunu na jiriquiajanaa na mishiquiojonura cashiicujaji. Naajuhuj, na sapatuhua cushiyonuujuaari-uhuj. Na nareenee pootujuaari, nocujaji na nujuatajara cashi. Naajuhuj, na naca na cojuatajara, cumoco casaa cushiyonuujuaari. Na nijiniaquetucujaja mueruu pootujuaariuhuj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiaca nia quiri, nioojia nia cojuanura Sesaacaacujaji, nojuaja mariqui nia cararoreeri

niaa jaara sesa miiri. Cunoori juhua nia turtuconee nia cushishano. ¹⁵ Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni paniyajuhuj. ¹⁶ Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasoocuai. Naajuhuj, Pueyaso Rupaa nia niishiri maninia. Cunocuajaari Pueyaso Sohuanu nijiniaquetucujaja mueruu, pueya jiuujiajania na poonijionura. ¹⁸ Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari niajaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuaraanaa. ¹⁹ Naajuhuj, cucuara nia secojonuure, Pueyaso niquitionura janiya na niishitiaja, maninia cua pohuatanura Jesujiniji cua puereyaquiniutia. Cucuara nia secojorejuhuj, maatia cua niishitiniuria pueya, Pueyasoori puetunu pueyajanaa jiyanooni paniya saaja Jesucristoocua nojori tiuushacari.

20 Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

21 Pa panishano Tíquicocujaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. 22 Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

23 Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhujaniya nia quiniuria. Nojori cuaara nia jiyateera panitioojuacarajuhuj, seetanujuanaa Jesucristoocua tiuujia nia quiniurajuhuj. 24 Naajuhuj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuate seetanujuanaa Jesucristo panijiacacujani.

**Quiarinio pueyaso rupaa pa jiyaniijia
Jesucristojiniji pueyano rupaajinia
New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

90034700-94c6-5f48-ae9c-2383843fed68